

Ho hapilwe thepa ya dingaka tsa radioloji ka lebaka la sekoloto sa lekgetho sa R52-million.

Tshwane, 25 Hlakola 2022 – Thepa ya dingaka tse pedi tsa radioloji e hapilwe ke Sherifi ya Lekgotla le Phahameng ka lebaka la sekoloto sa lekgetho sa R52-million se kolotwang Ditshebeletso tsa Lekgetho tsa Afrika Borwa (SARS).

Balaodi ba sebaka sena sa bongaka se mane Sepetleleng sa Louis Pasteur, Pretoria, se bitswang *Drs Mkhabele and Indunah Diagnostic Radiologists Inc*, ke Ngaka Zulu Mkhabele le Ngaka Mevis Ponde.

Molefalekgetho enwa o ile a etsa kopo ho SARS hore ho be le tjebisano empa sena se ile sa hanwa. Lengolo lena la kgano le ile la romelwa ho molefalekgetho mmoho le lengolo le letjha la tseko ya makgaolakang. Molefalekgetho ha a ka a arabela lengolo lena la tseko ya makgaolakang le la kgano.

Sekoloto sena ke lebaka la dinyehelo tse fapaneng tsa dikgutliso ho SARS, ho akareditswe lekgetho la lekeno la khampani, Lekgetho la Lefa ho ya ka Moputso (PAYE) le Lekgetho la Boleng bo ekeditsweng (VAT) sa nako ya dilemo tse tharo.

Ha refetela tabeng e nngwe, Sherifi o ile a beha fantising thepa ya Edison Power Gauteng Pty Ltd, e leng khampani ya kontraka ya tsa motlakase, ka mora hore e fane ka dikgutliso ntle le tefo. Thepa ena e hapilweng ka Loetse ngwahola, e akanywa ho ba ya boleng ba R20-million. Ho se ikobe le tefo ya lekgetho ka Edison ho etsahetse ka nako ya dilemo tse pedi.

Khomishenara ya SARS Edward Kieswetter o boletse hore mokgatlo o entse qeto ya ho ba le maikemisetsa a mawala a hlakileng a ho nolofaletsa balefalekgetho dintho ka ho fana ka tlhakisetsa le netefaletso mabapi le boitlamo ba bona ba boikobelo.

"Re nka hore boholo ba balefalekgetho ke batho ba tshepahalang le ba batlang ho ikobela molao. Ka ho etsa jwalo ba ba le seabo ho phahamisweng ha lekgetho le hlokehang ho thusa ho aha mmuso o nang le bokgoni o ka kgonang ho sebeletsa baahi bohle ba ona.

"Le ha ho le jwalo, ho se ikobe le tefo ya lekgetho ho etswang ka boomo le ka bonokwane ho tswa ho mohlodi ofe kapa ofe, o keke wa mamellwa. SARS e tla sebedisa tsohle tse molaong le tse matleng a yona ho thafalletsa le ho etsa hore ditjeo e be tse hodimo bakeng sa balefalekgetho le bahwebi ba jwalo," ho rialo Khomishenara ya SARS.

Ho fumana lesedi le fetang lena, ikopanye le SarsMedia@sars.gov.za